

La Lettre Jèrriaise *Les Chantchièrs*

Bouônjour, Ch'est Dâvi Benn ichîn auvre La Lettre Jèrriaise.

Probabliément, j'avons touos tchique "bête noire". Pour mé ch'est qué j'n'avons pas consèrvé not' histouaithe dé nos chantchièrs. Bein seux j'avons not' magnifique Mûsée Mathitînme, i' y' a la stchelette d'un baté au Havre des Pas, où'est qu' 'tait lé chantchi Alix, i' y' en a un aut' à Gouôrray et les noms dé tchiques batchieaux bâtis ichîn sont sus les pièrres à la caûchie d' St Hélyi. I' y' a un diversément bouôn livre par John Jean. Mais, i' y' a quâsiment rein pour visiter et apprécyi.

Et acouo ch'tait eune îndustrie bein împortante pour L'Île. I' faut penser qué j'bâtinmes pus qué deux milles grands batchieaux, auve eune bouonne réputâtion pour qualité, deuxième seulement à l'îndustrie Écossaise. La maintchi du nombre fut bâtie dans lé dgiêx-neuvième siècl'ye dans ieune des septante-trais, OUI, septante-trais chantchièrs.

Mais chute grande îndustrie pâssit l'pas pa'ce qué les batchieaux c'menchîtent à êt' bâtis en acyi à la pliaiche dé bouais.

Lé transport d'acyi 'tait trop chi, et bein seux les batchieaux à vailles fûtent rempliaichis par les batchieaux à feunmée. Et acouo des batchieaux d'pêque bâtis au c'menchement du vîngtchième siècl'ye.

Partout l'Île i' y' avait des chantchièrs et les pus grands 'taient à Gouôrray, Havre des Pas, St Hélyi et St Aubîn. Ch'est încryabl'ye qu' un tas d' ches batchieaux allîtent aussi liain qu' l'Australie, l'Orient, et bein seux l'Améthique et l'Cannada, sus toute la côte dé Gaspé.

J'trouve tout ch'na mèrveilleux qué des batchieaux bâtis ichîn 'taient capabl'yes dé viagi si liain!

Et tch'est qu'j'avons d' restant? – Presqué rein!!

Par întance lé chantchi à F C Clarke 'tait probabliément lé pus grand dans L'Île. I' fut bâti en mille huit chent quarante-quat'. I' tait au Vouêt dé West Park et tout près d' la Grève et les batchieaux pouvaient être lanchis sus les grand' mathées. À chu chantchi les grand's chèrges dé bouais arrivaient et i' 'taient sciées en poutre ou en plianche. I' y' avait d's établ'yes pour les j'vaux, nécessaithes pour lé fort travas, eune forge pour faithe d's ôtis et lé fé pour les batchieaux, eune office pour dessiner et eune maîson pour lé dirigeant. Souaixante-deux

batchieaux fûtent bâtis ichîn et deux 'taient pus dé mille tonnieaux. Mais, i' freunmit en mille huit chent souaixante-sept.

Tchi damage qu'i' fut détruit à la pliaiche dé lé garder comme mûsée!

Tchiques noms associés auve d'aut' chantchièrs 'taient Alix, Georges Deslandes, pus qué chent batchieaux 'tait bâtis ichîn, Esnouf et Mauger, George Asplet et Philippe Grandin et d'aut's.

Un tas dé tchènes pour les batchieaux v'naient dé France pa'ce qu'i' tait miyeu marchi qué l'tchène Angliais.

Bein seux bein des chantchièrs n'freunmîtent pas à cause dé la "retraite" mais pa'ce qu' i' n' y' avait pas d' ordres. Bein d's hommes perdîtent lus travas. P't-êt' les tchèrpentchièrs trouvîtent du travas dans la bâti'thie d'mâisons, les forgeurs fûtent empl'yis par les fèrmièrs. Bein d's hommes lus trouvîtent sans travas à la fin dé mille huit chent huiptante. Les cordgièrs, les faiseurs dé spèrre et les vailièrs étout.

L's Hommes comme lé Charles Robîn, et l' sujet dé ma dreine Lettre, Thomas Benjamin Davis, éthaient-i' gângni eune fortune et autant dé succès s' i' n' avaient pas ieu les chantchièrs sus lus pas d'porte? J'éthêmes autant des bieux portraits des batchieaux à vaile par Philipe John Oules? Janmais jé n'saithons!

Pouor mé ch'est difficile d'înmaginer qu'eune îndustrie si împortante peut dispathaître si vite.

Combein des mousses au jour d'aniet, et p't-êt' lus pathents, savent autcheune chose autour l'îndustrie et les chantchièrs et les batchieaux?

P't-êt' tchitch'un auvec un mio d'veue voudrait présèrver les restants dé not' Héthitage dé chantchièrs et pouortchi pas à La Folie?

À bétôt